

Jo er sammli für Griecheland seit de Fretz wo vormer steyt
für Portugal ond Spanie au wenn das so witergeyt
doch jetzt geuis dene Staate weder besser om d`Scholde wärd nömm gschleglet
sed em Hildebrand si Frau dene ehri Finanze reglet

Als Schnetzelbänkler träte au hüt weder uf das wetti euch zersch no verzelle
eusi Herscheplatzmuuser wonner scho ghört händ das send drey flotti Gselle
ond den no mer vom Komedi-Team mer send 4 Persone ohni vakanz
jo du ond dem säge mer Siebe denne konkordanz

Mer Schwyzer mer send jetzt alli sehr truurig wer mag eus das verdänke
well euse Liebling de Didier Cuche sini Schi tuet an Nagel hänke
nor de Roger Federer de het gseit sin Rücktritt esch was wunderbares
jetzt werdi de vellecht au weder emol einisch Sportler des Jahres

Nachdem de Xherdan Shakiri euse Kosovar met sine Tschutschueflosse
z`Basel d`Bulgare em Alleingang het 3 - 0 abgeschosse
meint d`Susan Hochueli ich wett mer chönnt über all Osländer so positiv brechte
jo den wörde ned emol die z`Bettwil of ehri Asylante verzechte

Vor ehrer erschte Setzig im Ständerot errt d`Pascale Bruederer planlos umhär
bes schliessli der Abwart vom Bondeshus chonnt ond frogt wos Problem wär
drofabe het d`Pascale ganz ufgregt gseit sie fendi bem beschte Welle
niene e dem Hus de Ruum wosi chönn ehres Baby stelle

Jetzt wo d`Starchstromleitig en Bode muess send die vor Akut alli sehr froh
doch gsehn ich leider jetze scho s`nächste Problem wo werd cho
dromm schlön ich vor das die jetzt ame vor em schloffe düend d`Händ zämevalte
ond bätted: *liebe Hergott em Hemmel mach besoguet das die Leitig em Bode esch* bevor si d`Akws abschalte

De Hugo Schmid vo de Brogger Konfettispalter het mer gseit es gäb em z`dänke
jetzt dörfe mer ned emol me eusi Wärbig ad Strosselampe hänke
los Hugo ich cha met der metfühle au ich ärgere me grüüsi
well mer händ nähmli z`Rinike s`glich Problem be eusem Wooghüüsi

Eusi Fasnachtsplakette vo dem Jahr fend ich die schönscht wommer je händ gha
doch leider esch es e Fäldschig wien ich erfahre ha
es steui zwar drof „made in switzerland“ doch well das zvell tät choschte
müessti eigentlech droffestoh „made in ferne oschte“

A de letschte Wiehnacht do han ich mer öppis sehr nötzlechs Usdänkt
ich ha nähmli eusem Gmeindsarbeiter Viagratablette gschänkt
die nemsch den hani zom Schär Rolf gseit s`nächscht Jahr so ändi Novämber
für de Wiehnachtsbaum bem Wooghüüsi den het de ändli en rächte Ständer

Ond ich chätsche min Chätschgommi do lacht`mi es Meitli a
s`loht d`Wempere lo klempere ond frogt dörfi eine ha
es wösssi ned wo pfuse gings velech be der au
do hani gseit los gang of Röfenach det suecht en Pur schiends no ne Frau

Als Grossrot do het de Jörg Hunn de Rücktritt geh efang
jo ond als euse Gmeischrieber do macht ers au nömm lang
los Jörg wenn`d du nach diner Pansion ned weisch wed sellsch dini Zyt vertriebe
also ein wo so blödi Spröch macht we mer mögds a de Fasnacht do scho no liede

So nach em letschte Bank frog ich wie emmer ganz schüch ond ohni z`prahle
esch vellecht öpper do em Saal wo em Komedi ond sim Team eis wörd zahle
den söll de doch bitte zom Büffet renne aber ächli flissig
schliessli hämer be eus z`Rinike jo ned Tämpo drissig

*Der Komedi*¹²

Do het doch Travail.Suisse en Idee ond hofft das sie eus gfalli
dromm stemme mer jetzt dröber ab öber 6 Woche Ferie för Alli
min Nochber het usgrüeft vo dene 6 Woche ben ich öpe gar kein Verehrer
well de schaffet dörsch drü mol rote jo genau als Lehrer

Zugabe zu Vers 5 (unten)

ond schliessli het si den no gmeint es wörd si no interessiere
wo esch den eigentlech de Platz woni min Chenderwage cha parkiere
ond wosi denne no Wendle aneschleppt ond das grad tonnewiis
het si gseit nänei die send ned all för me öppis esch no för d' Ursula Wyss